

MOPROFETA WA GO

SWANA LE MOSHE

 ...go bowa gape, ka gore go be go le dilo tše dintši kudu tšeo di bego di itlhaotše ka kopanong yela go nna, ye nngwe ya tšona e be e le tirišano ye kaone ya badiša bohle, maikutlo a mabotse ale a go amogela, ga bonolo kudu mo sefaleng go šoma le batho, balwetši, bohle ba be ba le mmero o tee. Gomme ka gona ba—ba batho ba ba bego ba le ka batheeletšing, ka fao ba arabilego ka pela go mo—mo Moya, bjalo ka ge Moya wo Mokgethwa o tla sepela magareng ga bona.

² Gomme ke nno nagana gore mašego a mararo a mannyane a be a le mohuta wa bokopana kudu bakeng sa sehlopha se sekaone sa batho boka se. Gomme kamogelo ya lena e tšwago pelong go nna go tla morago le go direla le lena gape, ka nnete ke monyetla go nna go ba mo bošegong bjo.

³ Gomme ke thabetše ka go fetiša dilo tše dintši tšeo Morena a re diretšego ge e sa le ke le bone la mafelelo. Gomme ka pela ge, mohlomongwe, la pele la beke, goba mohlomongwe pele, ke duma go tšea bošego bjo botee go hlaloša se sengwe seo Morena a re diretšego. Gomme re e lebeletše go phuleletša pele ka botlalo bja yona lebakeng la kopano ye.

⁴ Bošegong bja go feta ke menngwe ke sehlopha sa bodiredi, gomme, go ba le ma—ma matena a moletlwana le bona ka kerekeng mo ka toropongkgolo, gomme ka nnete re ipshinne ka nako ya nnete ya kopanelo, nako ya go kgahliša kudu, ka mmero o tee, pelo e tee, morero o tee, selo se tee: go tagafatša Jesu Kriste.

⁵ Gomme le tla mmogo, go rulaganya dihlopha tša lena—tša lena, le go ya pele, ka tetelo ye kgolo ye. Bjale ke nako go Modimo go bontšha seatla sa Gagwe se se maatla. Gomme ke no ba le nnete bjalo ka ge ke eme sefaleng se, O tla dira seo, gobane A ka se kgone go šitwa. Go ne selo se tee feela seo Modimo a ka se kgonego go se dira, gomme seo ke go šitwa. O swanetše go ba mo—mo mošomong, O swanetše go boloka tshepišo ye nngwe le ye nngwe. A ka se kgone go šitwa, re a e dumela.

⁶ Kafao bjale ebang ka thapelong kudu ye, go kgabola di—di dikarolo tše dingwe di šetšego tša tirelo. Ke nagana ke swanetše go etela le Banna ba Kgwebo ba Bakriste le bona ka Madera, ke a dumela, goba felotsoko tlase mo ka dikarolong tša tlasetslase tša California, goba kgojana go theoga tsela go feta ye. Ga ke tsebe ditšhupetšo, le dilo, tikologong mo gabotse kudu. Gomme ke—ke kwešišitše bošegong bja go feta ke a nagana, Ngwanešu Troy, gore ke be ke swanetše go ba etela le se sengwe sa difihlolo,

gomme ga ke tsebe ge eba ke swanetše go ba go ye nngwe ya tše fa goba aowa. Fa? Thwi fa ke yona. Gabotse, seo se kaone. Gomme ke thabetše sebakabotse seo.

⁷ Full Gospel Christian Business Men ye e bile ye nngwe ya thekgo ya ka ye kgolo ka go ntšeela ka gare go thuša go phethagatša morero wo ke dumelago gore Morena o nthometše go thuša go o dira, seo e be e le go kopanya Mmele wa Jesu Kriste mmogo, nna, ke morero wa ka go dira seo, seo ke se se lego ka pelong ya ka, go bona bana bohle ba Modimo ka mmero o tee le ka pelo e tee, ba sepelela pele. Ka gona ke a dumela ge seo se direga, mošomo o tla be o le kgauswi le go fela nako yeo, o tla dira, Mileniamo o tla tsena, Tlhatlogo e tla tla. Gomme ka nnete re a rapela le go hlokomela, re letetše nako yeo.

⁸ Gomme ge re bona sešupanako se rotla go dikologa, sešupanako sa nako sa Modimo, diprofeto tšohle di phethagaditšwe le go dula thwi godimo pele ga rena bjale bakeng sa go tla ga Mesia, ka kgonthe re batho ba ba thabilego, gomme re swanetše go ba ka tsela yeo, ka gore re lebeletše pele go tiragalo ye kgolokgolo yeo e kilego ya direga ka go histori yohle ya motho, goba e ka tsogego ya dira: go tla la bobedi ga Morena wa rena Jesu Kriste, Morwa wa Modimo, go ubulela Kereke go Yenamong le go Mo tšeela go Yenamong. A nako ya letago e tla bago! Go na le ditiragalo tše ntši tše kgolo di diregile ka lefaseng, dilo tše ntši tše kgolo, eupša ga go selo sa go swana le seo.

⁹ Gomme bjale, re lemoga gore ebile le tlhago yonamong e bitša bakeng sa letšatši leo. Tlhago e a tsetla, se sengwe le se sengwe se bonala se šekamile, letšatši ga le phadime bjalo ka ge le be le dira. Saense e re botša gore lefase le kokomogile dikgato tše *kaekae* bogareng tše di dirago lewatle le se iše kudu mo gare gomme go teba go ya Phoulung ya Lebowa le Phoulung ya Borwa, gomme gabotse go no se be selo. Dinaledi ga di ka diobiting tša tšona bjalo ka ge di swanetše go ba, gomme se sengwe le se sengwe se bonala se šešerekane, yohle e letile, e tsetla bakeng sa letšatši lela la phethagalo, ge Morena wa rena Jesu a tla tla le go phethagatša se sengwe le se sengwe seo se sego sa phethagala.

¹⁰ Gomme le go Kereke ye e sego ya phethagala bjale e tla phethagatšwa ka leratong le maatla a Kriste, ebile go fihla lehu lonamong le ka se sa ba le maatla a itšego godimo ga Kereke gape. Bao ba hwilego tseleng, go theoga go kgabola ditišo, ya pele, ya bobedi, ya boraro, ya bone, ya bohloano, ya boselela, le go ya go tišo ya bošupa, ba hwile ba letile le, lehu la bona le ka se ba šitiše go ipshina ka lona, gobane phalafala ya Modimo e tla galagala, gomme bahu ka go Kriste ba tla tsoga pele. Oo, a nako ya letago re phelago ka go yona!

¹¹ Ka mehla ke be ke makala: Mokgethwa Paulo o be a tla dira eng, goba—goba Petro, goba ba bangwe ba baapostola, ge—ge

ba ka kgona go tsoga go tšwa borokong bja bona le go lebelela godimo ga lefase, gomme ba bona dilo tše Moya wo Mokgethwa o di boletšego ka bona ka letšatšing la nama ya bona, le go e bona e etla go phethega? Ba be ba tla goelela mosegare le bošego go tloga dikhoneng tša mekgotha, le mo gohle, “Lokišetšang go kopana le Modimo!” Ka gore ke selo se Kereke e se letetšego.

¹² Lefase, nnete, ka mehla le bile ka sebeng, seo ke sohle le se tsebago ke sebe, gomme le nno leta go bona ke mang mopresitente wa go latela, goba naletšana tsoko ye mpsha ya mobi e tšwelelago, goba lenaneo le leswa la thelebišene, goba se sengwe. Eupša re letile go tla ga Morena. Yeo ke nnete. Bao ba Mo letetšego ba tla mpshafatša maatla a bona, ge re letile. Yeo ke tshepišo ye Modimo a re filego yona, gomme re—re lebeletše pele go yeo: maatla a rena a mpshafatšwa letšatši ka letšatši bjalo ka ge Modimo a tla re fa.

¹³ Bjale, bošego bjo bongwe le bjo bongwe, Morena ge a rata, re ya go rapelela batho ba go babja, go bolela go tšwa go Lentšu, go dira dipitšo tša aletara. Gomme modiradibe yo a lego mo yo a sa tsebego Modimo, a nke ke re go wena, mogwera wa ka modiradibe: o kitimela Leswikeng feela ka lebelo ka mo o kgonago.

¹⁴ Gomme lena mo ba le sego la amogela Moya wo Mokgethwa morago ga ge le phološitšwe, le se ke la tlogela moago wo go fihla le O amogetše, ka gore tshepišo ke go “mang kapa mang a ratago a tle.” Go ka kgona go ba motho yo mongwe le yo mongwe ka moagong bošegong bjo a ka kgonago go amogela Moya wo Mokgethwa bošegong bjo. Ga go lebaka gobaneng o se wa swanela, gobane O bile lefaseng lebaka la mengwaga ye dikete tše pedi ge e sa le Letšatši la Pentecost, gomme O fa bošegong bjo go kolobetša modumedi yo mongwe le yo mongwe.

¹⁵ Ga go lebaka go motho e ka ba mang go tlogela moago a babja bošegong bjo, gobane Matwetwe yo Mogolo o fa, Jesu Kriste. Ga go bohlokwa go e ka ba mang go sepelela ntle godimo ga mahlotlo, go kgokološwa go tšwa setulong sa bagolofadi, go ya ntle a babja, gobane Matwetwe yo Mogolo o fa, poreisi e lefilwe. Se sengwe le se sengwe se lenaneong la feela se sengwe go direga bjale go bolela ka se A se tshepišitšego, le go Mo šetša a se tliša go phethega.

¹⁶ E no nagana, ga go bodumedi bjo bongwe ka lefaseng lohle bjo bo ka kgonago go dira setatamente seo; Buddha, Mohammed, ga go le botee bja mabodumedi a lefase bo ka kgonago go dira mohuta e ka ba ofe wa setatamente boka seo, mothomi wa bjona o hwile, o bolokilwe, o ile pele. Eupša Morena wa rena o hwetše dibe tša rena kua Khalibari gomme Modimo o Mo tsoitše ka letšatši la boraro, gomme O a phela magareng ga rena bošegong bjo, Jesu wa go swana, a diragatša, a dira, “Mediro ye Ke e dirago, le tla e dira le lena.” Ditshepišo tša gagwe ke therešo.

“Eyang ka lefaseng lohle, rerang Ebangedi, fodišang balwetši, thakgafatšang balephera, tsošang bahu.” Mehlolo yohle yeo A e tshepišitšego bjale e a direga.

¹⁷ Oo, yo mongwe a ka re, moswaswalatši, “Ga go ne kgonthe ya phodišo Kgethwa. Ga go selo se sebjalo bjalo ka kolobetšo ya Moya wo Mokgethwa.”

¹⁸ Ba ka se e dumele, gobane ke basedumele, e no ba go bao ba dumelago. Ge Jesu a tlile, Morwa wa Modimo, sa pele ka lefaseng, O tlile go bao ba bego ba lebeletše go Mmona. Ba bantši dikgorong, le ba bantši go kgabola toropokgolo, gomme ba bantši go kgabola setšhaba ba be ba se ba Mo lebelela, ba kwele ka yona, “Feela sehlopha sa bohlanga,” ba e fetile. Eupša go bao ba bego ba Mo lebeletše, pelo ya bona e be e tletše thabo, le Yena bošegong bjo, gomme ba tla ba le Yena go ya go ile.

¹⁹ Bošego bja rena e tla ba histori gosasa ge gosasa go etla. Mokgwatebelelo wa rena go Kriste bošegong bjo o ka beakanya se re tla bago ka go histori gosasa. Kafao a nke bošegong bjo re thome kopano thwi ka go dula fase renabeng, “re beeleng thoko boima bjo bongwe le bjo bongwe bjoo bo re nyamišago gabonolo, gore re ke re kitime ka kgotlelelo lebelo leo le beilwego pele ga rena.” A re beeng dipelo tša rena, matsapa a rena le se sengwe le se sengwe re nago naso ka kopanong ye, gobane le a bona dikereke tšohle tša lena di emetšwe.

²⁰ Gomme re—re leka thata, bjalo ka ge ke boletše go badiredi bošegong bja go feta, e sego go tliša se sengwe se seswa, e sego go leka go thoma kereke ye mpsha, eupša go aga godimo ga motheo woo banna ba ba o theilego, woo o theilwego ke Jesu Kriste le baapostola, go tliša maloko ka gare, go tliša Ebangedi go bona ka mpho ye Kgethwa, go ba dira ba ipshine ka ditšhegofatšo tša Modimo. Menyetla yohle yeo Kriste a e hwetšego ke ya gago, ke phahlo ya gago ya sebele. Gomme re mo go tšoenana magetla le baena ba go thuša se sengwe le se sengwe re kgonago go dira se se—se setšhaba se sekaonekaone go phela ka go sona, bothatana go dira se e lego phošo, le bonolonolo go dira se se lokilego. Woo ke morero wa rena fa.

²¹ Bjale, o ya thwi ka gare le rena, rapela, bitša mogaleng, tlišang balwetši ntle, ba tlišeng ka gare, ba hlholeletšeng go ba ba kgotlelelo bjale, gobane ga re nyake go ya go se feela boka re bile. . . . re sa tšo ba bošegong bjo, re nyaka go ya go yona go tseba gore re na le go fihla Kriste a re go lekanetše. Re nyaka go dula fa le go rapela le balwetši, gomme ge se sengwe se direga seo se fofelago godimo, re tla ba fa go le thuša, badiredi ba ba hlhlilwego go tseba se ba ka le botšago. Re a dumela re ya go ba le kopano ye kgolo. A le dumela sa go swana? Amene.

Bjale pele re bala Lentšu, a re inamišeng dihlogo tša rena bakeng sa thapelo.

22 Morena, re a Go leboga go tšwa mabotebong a pelo ya rena bakeng sa peakanyo ye botse ye gape, gore re kgone go ema fa ka go toropokgolo ye botse ye ya moedi e bitšwago San Jose, le tšohle tša ditoropokgolo tša kgaetšedi tikologong ya yona. Gomme bošegong bjo, re ikwela gore ka lebaka la kopano, le ke lefelobogare mo nakong, gore moo dikereke tše dintši go tšwa toropongkgolo ye di tlilego le go bea matsapa a tšona, gomme ba šomile thata, le go kwalakwatša, le go dira dilo komana bakeng sa kopano.

23 Gomme Modimo re beilwe bogare mmogo fa ka lefelong le tee ka mmero o tee, re letile go sepela ga Moya wo Mokgethwa. O tla tsena ka maatla a magolo, gore e tla ba kopano ye e tla gopolwago botelele. Gomme ge dipuku di tswaletšwe ka ditiro tša lefase, gomme ge di fedile, gomme re ema Setulong sa Kahlolo, a nke go bolelwe gore ge kopano ye e etla go balwa go tloga ka Letšatši le legolo lela, bao ka nnete makgolo, ee, dikete, ba tla emiša diatla tša bona ka ditone tša lethabo, gore, “E bile ka kopanong yela yeo ke hweditšego Jesu bjalo ka Mophološi wa ka.”

24 A nke gona go tle mothuthupo go tšwa go dimilione tše kgolo tše di tla bego di eme, “E bile fale moo leoto la ka la go kgopama le fodišitšwe.” Gomme yo mongwe, “Mahlo a ka a go fofala a bulegile.” E fe, Morena.

25 A nke e phatlalale yohle go kgabola mabili a magolo a ekonomi ya Modimo, gore kereke ye nngwe le ye nngwe e be le tsošetšo, gomme maatla a Kriste yo a tsogilego a fete go kgabola kereke ye nngwe le ye nngwe le moleloko yo mongwe le yo mongwe, go fihlela go tla ba le tsošetšo gohle godimo le tlase meeding ye. A nke e tle gape go swana le ge e dirile mengwaga ya go feta, Morena, tliša pele tsheola le pula ya kgogolamooko mmogo. Gomme a nke batho ba Gago bao ba bitšwago ka Leina la Gago, a nke ba tsošološwe gape. Re tliše morago go dikopano tša nako ya kgale tša Pentecostal, Morena, moo Moya wo Mokgethwa o ka bago le tokelo ya tsela. A nke re bee ka thoko dithuto tšohle tša rena le go no ba batho ba bonolo re hlhlwa ke Moya wo Mokgethwa, ka gore re a lemoga gore yeo ke tsela ye A hlhlago, ka tsela ya bonolo. E fe, Morena.

26 Bolela ka bahlanka ba Gago. Šegofatša badiša ba bao ba beilego matsapa a pele ka go dula fa pele ga phuthego ya bona bošegong bjo, le bohle bao ba lego gona. Morena, tšhollela tšhegofatšo ya go ikgetha godimo ga bona. A nke kopano ye e dire mabodiredi a bona go phagamišetšwa godingwana, a nke ba šušumetšwe kudu, Morena. Gomme masogana le makgarebe ba dikereke tša bona ba šušumetšwe go ya ka mašemong a boromiwa le go akgofiša go Tla ga Morena ka go iša Ebangedi ye go sebopiwa se sengwe le se sengwe. E fe, Tate.

27 Gomme ka Letšatši le legolo lela ge re tla ema ka Bogoneng bja Gago, ka dihlogo tša go kokobela re tla khunama le go re e be

e se matsapa a rena, eupša e bile Moya wa Gago wo o sepetšego magareng ga rena. E fe, Morena. Ka gore re a e kgopela, Leineng la Morwa wa Gago, Morena Jesu, Mophološi wa rena. Amene.

²⁸ Ke duma go lena bošegong bjo bao le nago Dibeibele tša lena go phetla le nna go Ebangedi ya Mokgethwa Mareka tema ya 6 bakeng sa feela karolo ya go bala Lentšu. Ke tshepa gore ebile palo ya Lentšu e tla ba tšhegofatšo ye kgolo go yo mongwe le yo mongwe wa lena. Gomme latelang le nna ge re bala.

²⁹ Ke nagana se sengwe sa dilo tše kgolo magareng ga Bakriste lehono, ga ba bale Lentšu go lekanela. Ke nagana legae le lengwe le le lengwe le swanetše go ba le Beibele e balwa ka go lona makga a mabedi goba a mararo ka letšatši.

³⁰ Ke elelwa e se kgale ka Italy, ebile mo tafoleng ge mokgethwa, tate wa kgale a bile le Beibele ya gagwe e dutše tafoleng, pele ebile ba ka ja ba tla ema ka seatla se tee godimo ga tafola, seatla sa bona sa ngele, seatla se setona se komana go phagamela godimo go Modimo. Gomme mokgethwa, tate wa kgale o be a bala karolo ya Lengwalo, gomme ba be ba tla inamiša dihlogo tša bona le go rapela, ba phagamišetša diatla tša bona godimo le go tumiša Modimo bakeng sa borotheo bjo bo bego bo le tafoleng.

³¹ Oo, Moya wo Mokgethwa o keteka ka Lentšu. “Motho a ka se phele ka borotheo bo nnoši, eupša ka Lentšu le lengwe le le lengwe le tšwago molomong wa Modimo.” Gomme ye ke Lentšu la Modimo. Ithuteng go tliša Dibeibele tša lena bjale le go bala le rena.

³² Mokgethwa Mareka 6, gomme go thoma ka temana ya 45:

Gomme ka pelapela o gapeleditše barutiwa ba gagwe go tsena ka sekepeng, le go ya ka lehlakoreng le lengwe pele Bethania, ge a rometše batho kgole.

Gomme ge a ba rometše kgole, o ile ka thabeng go rapela.

Gomme ge mantšiboa a tlile, sekepe se be se le bogareng bja lewatle, gomme yena a le nnoši nageng.

Gomme o ba bone ba katana...ba hudua; gobane phefo e be e le kgahlanong le bona: gomme e ka ba tišo ya bone ya bošego o tla go bona, a sepela godimo ga lewatle, gomme a ka be a fetile kgauswi le bona.

Eupša ge ba mmone a sepela godimo ga lewatle, ba naganne e be e le moya, gomme ba goeleditše:

Gobane bohle ba mmone, gomme ba tshwenyegile. Gomme ka pela o boletše le bona, gomme o rile go bona, Ebang le tlhohleletšo ye botse: ke Nna; se boifeng.

Gomme o ile godimo go bona ka sekepeng; gomme phefo ya ema: gomme ba be ba maketše kudu bonabeng go sa lekanywego, le go tlabega.

Gobane ga se ba hlaologanya mohlolo wa dillofo: gobane dipelo tša bona di be di thatafaditswe.

Gomme ge ba tshetše, ba fihla nageng ya Genesarete, gomme ba batamela kgauswi le lebopong.

Gomme ge ba tšwile ka sekepeng, ka pelapela ba mo tsebile,

Gomme ba kitima go kgabola selete seo ka moka go dikologa mogohle, gomme ba thoma go rwala ka mepeteng bao ba bego ba babja, . . . ba . . . moo . . . a bego a le gona.

Gomm gohle mo a tsenego gona, metseng, goba ditoropongkgolo, goba magaeng, ba robaditše balwetši mekgotheng, le go mo lopa gore ba ke ba kgwathe ge eba e be e le eupša morumo wa kobo ya gagwe: gomme ba bantši ba ba mo kgwathilego ba ile ba dirwa go fola.

A nke Morena a oketše ditshegofatšo tša Gagwe palong ya Lentšu la Gagwe.

³³ Ke a nagana e be e no ba iri e tee pele ga go dikela ga letšatši ge motheadihlapi yo mogolo ka a gagwe a magolo, magetla a magolo a thoma go kgoromeletša sekepe se sennyane go tloga lešing, ntle ka le—le letsheng, gomme ge mafelelong a dirile motsetlo wa gagwe wa mafelelo, gomme a kgoromeletša sekepe se sennyane ka meetseng, a gatela godimo le go tšea setulo sa gagwe ka lehlakoreng la ngwanabo Andrea, a topa lehuduo gomme a thuša go dikološa sekepe se sennyane go dikologa.

³⁴ Gomme ge ba thoma go tloga lešing, le go kwa batho ba šišinya šalang gabotse, ge ba be ba le ntle go tšwa bokgole bja go kwa bja lešaba, ke kgona go no ba bona ba lebelelana seng sa bona ka makalo, ba dutše ka setu dinakwana di se kae.

³⁵ Gomme go swanetše go ba go bile Johane yo monnyane yoo a thomilego poledišano, se sengwe boka se: “Ke kgona go elelwa ge ke be ke sa no ba mošemane yo monnyane, ka fao mme wa ka a bego a fela a mpalela Mangwalo a Makgethwa, le ka fao ke tla ipshinago ka kanegelo yela ya ge Modimo a be a tliša batho ba Gagwe go naga ye ya go šegofala, gomme o ba biditše ka Leina la Gagwe, gomme o ba arogantše go tloga go Baegepeta ba gosedumele, gomme a ba gapela ka lešokeng, goba, a ke re, a ba hlahlalela ka lešokeng moo go bego go se selo go ja, gomme ga go lefelo le lebotse bakeng sa dimela, eupša o be a ba diretše tshepišo gore O be a tla ba fa, ge ba ka no sepela ka ditseleng tša Gagwe le go boloka melao yohle ya Gagwe.”

³⁶ Gomme ke kgona go mo kwa a re, “Ye nngwe ya dikanegelo tša go makatša tša leeto leo e be e le ye, gore ka morago ga bana ba bannyane, mama o rile, ba boletše dithapelo tša bona gomme ba robetše fase go robala, gore Modimo o romile Barongwa ba Gagwe, gomme ba ile pele gohlelele lefaufaug, gomme ba tšea

borotho, gomme ba bo ngwathaganya, gomme ba bo phatlalatša godimo ga mobu wo boleta.

³⁷ “Bana ba bannyane ba be ba maketše bjang mosong wa go latela le batswadi ba bona go tsoga, gomme ba ya ntle, le go lebelela, gomme ba bona se seatla sa Jehofa se se dirilego, seo se rotheditšego borotho bja bona bja tšatši ka tšatši godimo ga mobu. Ba be ba se ba swanela go bo apea, goba—goba go godiša korong, goba go e šila, eupša bo be bo apeilwe, le go lokišwa, le go bewa mobung bakeng sa bona.”

³⁸ Gomme ka morago a retološetša sefahlego sa gagwe sa go bopego bonnyane go bagolwane ba gagwe, gomme o rile, “Lehono, re hlatseditše se sengwe se segolwane, ka gore ga se sa direga bošego, re bone ka mahlo a rena a mabedi se A se dirilego ge A tšere dipisikiti tša mošemane yo monnyane yola le dihlapa, le go di roba, le go fepa dikete tše tlhano pele ga mahlo a rena. Ga se nke ka nagana gore ke tla phela go bona Jehofa Modimo a sepela boka A dirile mengwageng ya go feta.

³⁹ “Ka therešo, baena ba ka,” a ka no ba a boletše se, “gore Modimo a ka se tsoge a ba yo monyennyane goba a fokola go itšego, ka mehla O tla ba Modimo. Ka fao pelo ya ka ye nnyane e makatše ke kae Modimo a hweditšego borotho bjola bjohle. Gomme ka mehla go mmakaditše, ke kae A hweditšego borotho bjola bjohle, gomme ke sa maketše ka fao A sa kgonago feela go tliša borotho, eupša O tlišitše hlapi ye e apeilwego le go fepa dikete tše tlhano pele ga mahlo a rena beng. Therešo, ke a dumela gore Yena ke Morwa wa Modimo.” A ka no ba a boletše se sengwe boka seo.

⁴⁰ “Gomme a le lemogile go makala ga batho? Gomme a le bone tebelelo godimo ga sefahlego sa Gagwe ge A phagamišeditše borotho godimo go Tate wa Gagwe wa Legodimong le go bo šegofatša? Ka fao go bolela le Modimo go swanetšego go be go dirile ponagalo ye bjalo godimo ga sefahlego sa Gagwe! Re ka se tsoge ra belaela gape,” Johane yo monnyane a ka no ba a boletše.

⁴¹ Gomme batheadihlapi ba bagolo ba dutše fale, ba thoma go fufulelwa nthatana kudu go tšwa go hudueng, gobane phefo e be e thomile go foka, gomme o retologile, gomme o rile go Johane le ka moka ga bona, “Ke kgona go elelwa, le nna, bjalo ka mošemane. Tate wa ka e be e le Mofarasei, sehlopha sa bodumedi bja rena. Gomme o be a fela a bala go tšwa go nna . . . go nna go tšwa go Mangwalo a Makgethwa, gomme a bolela gore Moshe o file tshepišo gore ka mehla re ka se be re nnoši, eupša Morena Modimo wa rena o tla tsoša go tšwa magareng ga rena Moprofeta wa go swana le yena, gomme yo e tla ba Yena yoo a tla biletšago dipelo tša Israele morago go Modimo.

⁴² “Gomme ge Andrea, ngwanešu wa ka a dutšego fa, a etla, a mpoditše gore o dumetše Mmetli yo wa Monasaretha o be a le Yena yola, go be go le bothata go nna go dumela gore e tla

direga ka letšatšing la ka. Eupša ge ke sepeletše ka Bogoneng bja Gagwe, gomme O ntebeletše lekga la mathomo ka bophelong bja ka gomme o rile, 'Leina la gago ke Simone.' Gomme ga se A lebala tate wa ka yo mokgethwa, wa kgale, gobane O rile, 'O morwa wa Jona.' Ka gona ke tsebile Yoo e swanetše go ba Moprofeta yola yo a bego a swanetše go tla lefaseng. Go tloga fao go e rarolotše go nna go ya go ile. Ke Mo dumela ka tšohle tšeo di lego ka go nna, ke a Mo dumela."

⁴³ Gomme ge poledišano e ile pele, go bolelwa ka ditanyašedi, e swanetše go ba e bile Filipi yo a rilego, "O ka be o eme hleng le Ngwanešu Nathaniele wa rena ge ke kwele Mong wa rena a mmošša mo a bego a le gona ge ke mo hweditše ka tlase ga mohlare.

⁴⁴ "Oo, nnete ge ke hweditše Ngwanešu Nathaniele, sa pele o be a le mohuta wa go swaswalatša se ke bego ke bolela ka sona. Ge ke mmoditše re hweditše Jesu wa Nasaretha, e bego e le Moprofeta yo Moshe a rilego o be a swanetše go tla, o be a no sola go se nene, ka baka la gore ke be ke kgona go bona moreo wola wo monnyane wa go tšinya wo a bego a na le wona sefahlegong sa gagwe, o ka re o re, 'Bjale, Filipi, ke mohuta ofe wa kanegelo o lekago go mpošša?'

⁴⁵ "Eupša ge a sepeletše ka Bogoneng bja Gagwe, gomme O rile, 'Bonang Moisraele, yo ka go yena go sego bomenetša!' go bile le phetogo ya kgonthe ka go ditebelelo tša gagwe. Gomme ka gona ge a Mmoššišitše O mo tsebile bjang, O rile, 'Pele Filipi a go bitša, ge o be o le ka tlase ga mohlare, Ke go bone.'

⁴⁶ "Gona go bile le tlhagišo ya go rapela. Go gonnyane go, go tšinya ga go swaswalatša go be go tlogile sefahlego sa gagwe, gomme o wele ka matolo a gagwe pele ga Mong wa rena, gomme o rile, 'Wena o Morwa wa Modimo; Wena o Kgoši ya Israele.' E be e le phetogo ge re Mmona a dira mehlolo ya Gagwe."

⁴⁷ Gomme ka gona yo motee wa bona a ka no ba a rile go Johane, "Go reng ka letšatši le re Mo dumeletšego go ba le sekepe, gomme A re fošetšang ka bodibeng, goba, lahlelang ntle, moo re bego re thea dihlapa bošego ka moka? Gomme re tsebile go be go se hlapi ka meetseng ale, efela O rile, 'Theošetšang lokwa bakeng sa go swara dihlapa.'

⁴⁸ "Gomme ge re tswaletše sehlopha se segolo sela sa dihlapa, e bile Simone yo a rilego, 'Tloga go nna, Morena, ke nna monna wa modiradibe.' O be a makatša gakaakang!"

⁴⁹ Gomme ka gona yo motee o rile, mohlomongwe e be e le Baratolomeo yo a boletšego se: "A bohle re be re sa tlabege ge re bowa go tšwa Samaria letšatši lela? Ke lemogile lekgarebe le etla go rotoga thaba ka tebelelo ya go nyama le go tshwenyega sefahlegong sa gagwe.

⁵⁰ "Gomme ge ba ganne go re fa borotheo, gomme ge re boile morago gomme re maketše go Mmona a bolela le mosadi yo,

gomme o be a Mmotšiša ka bodumedi bja rena. Gomme ge A rile go lekgarebe le, 'Sepela, tšea mogatšago, gomme le tle mo.'

"Gomme o rile, 'Ga ke ne mogatša.'

"Gomme O rile, 'Yeo ke therešo. O bile le ba bahlano, gomme yo o dulago le yena bjale ga se mogatšago.'

"O rile, 'Mohlomphegi, ke a bona gore O Moprofeta, gomme re a tseba ge Mesia a etla, O tla re botša dilo tšohle.'

"Gomme Mong wa rena o rile, 'Ke nna Yena yoo a bolelago le wena.'

⁵¹ "A tebelelego, a phetogo godimo ga sefahlego sa mosadi ge a retologile gomme a ile ka toropongkgolo go botša banna, 'Etlang, bonang Monna Yo a mpoditšego dilo tše ke di dirilego. A Yo ga se Yena yola Moshe a rilego o tla tla?'

⁵² "Gomme a le lemogile, gape, gore re be re gakanegile, go fihla go se le o tee wa rena a botšišitšego dipotšišo e ka ba dife, 'Gobaneng A be a bolela le mosadi yo?' Re nno homola gobane re be re maketše ka maatla a Modimo a šoma ka Motho."

⁵³ Oo, e tla ba selo se sebotse bošegong bjo, ge rena batho ba Pentecostal, le batho ba dikereke tšohle, re tla ikwela ka tsela ya go swana ka yona. Ge re ka ema ka makalo mo go šomeng ga Moya wo Mokgethwa mo matšatšing a, go tla no re tswalela molomo. Ke a dumela bothata bja yona ke, gore re bone bontši bo dirwa go fihla bo eba selo sa tlwaelo go rena.

⁵⁴ Boka kanegelo ye nkilego ka e kwa, e rile monna o be a eya lewatleng go khutša, go bona maphotho, go nkgelela meetseletswai a letswai, gomme o kopane le mošesiši wa kgale, gomme o rile, "O ya kae?"

⁵⁵ O rile, "Lewatleng go yo khutša. Ke badile ka lona, gomme ke hlologetše go le bona, eupša ga se nke ka ke ka le bona. Gomme pelo ya ka e thakgetše go tseba gore ke kgauswi le lewatle, lebakana le lennyane feela gomme ke tla kgona go bona se ke badilego ka sona, se ke lorilego ka sona. Gomme go tla ba go itapološa gakaakang go nna!"

⁵⁶ Gomme mošesiši wa kgale o rile go monna, "Ke belegetšwe lewatleng, ke phetše go lona lebaka la mengwaga ye mentši, gomme ga ke bone selo sa go tsikinya le go kgahliša ka lona." Le a bona, o be a phetše ka go lona botelele kudu, go fihla le eba selo sa tlwaelo.

⁵⁷ Ke a boifa gore rena batho re bone Modimo a etla fase ka matleng a Gagwe le go phološa balahlegi le go tlatša ka Moya wo Mokgethwa bao ba nyakago, le go fodiša balwetši, go fihla go eba selo sa tlwaelo go rena. Re šitwa go hwetša ditlhagišo tše botse tša Moya wo Mokgethwa ge A tliša maatla a Gagwe magareng ga rena, gomme re bona botse bja Gagwe, re Mo šeditše a šoma, re tseba gore yoo ke Mophološi wa soulo ya rena, selo se nnoši sa kgonthe seo se šetšego ka lefaseng seo re kago go

swarelela go sona. Metheo yohle ye mengwe e tla senywa, mebušo yohle ye mengwe e tla senyega, eupša Mmušo wo o tla tšea go ya go ile.

58 Ge se sengwe se diregile ka setšhabeng sa rena go re tsikinya, gore ba be ba eya go fokotša metšhelo, goba se sengwe boka seo, re tla be re e bolela mogohle, eupša Kriste o a tla le go phološa soulo le go ba fa Bophelo bjo Bosafelego, gomme re sepela go tloga mo o ka rego ke selo sa go tlwaelega; go fodiša balwetši gomme re nagana ke selo sa go tlwaelega.

59 Ge poledišano e ile pele, e swanetše go ba e bile Sathane yo a lebeletšego ntle go tšwa ka morago ga maru, gomme o rile, “Ke ba hweditše ba nnoši, ga a na le bona. Bjale ke nako ya ka go fetša ka bona.”

60 Yeo ke tsela ye Sathane a sepelago, yeo ke tsela ye a hlokomelago, seo ke sebakabotse se a se letelago, ke go hwetša nako ye nngwe gore re ya ntle go se re se bitšago, “boithabišo bjo bonnyane bja leago,” go bapala dikarata, goba go tsenela rali tsoko, goba se sengwe seo e sego sa bomodimo, o emetše go go swara o sa itebetše, o emetše go fihla lefelong leo kereke e bilego bolelo, e bile go emaema kudu go dira se sengwe gape, ke ge nako yeo a hlaselago.

61 “O kgole go tloga go bona, gomme bjale ke sebakabotse sa ka go ratha.” Ke a boifa gore seo ke se se fošagetšego ka dikereke tša rena. Re bile le mohemo wo monnyane wa katlego lebaka la mengwaga ye masomepedi ya go feta goba bontši, tšhelete ye ntši, gomme re ile ka go mananeo a magolo a go aga, bjale, seo se lokile, gomme re ile ka go dilo tše dingwe, tše di tla bago gabotse, dithuto, le go swinelela godimo dithapo tša thuto, le—le go aga diseminari tša rena gannyane go fetiša ka kgonagalo, le go tliša banna ka kua ba e lego ditswerere gannyane, mohlomongwe, go feta deane wa kgale, le—le dilo di se kae boka tšeo, go lego seo se lokile, eupša re hwetša re ile thoko ntle le dikopano tša fešene ya kgale, tša go leta, ditšhegofatšo tša fešene ya kgale tša Pentecostal tše di bego di fela di wela magareng ga rena. Gomme Sathane o le swere le sa itebetše, ke moo a le nyakago gona, le sa itebetše.

62 Gomme ka gona a thoma go budulela mohemo wa gagwe wa mpholo ntle godimo ga mawatle gomme o—o bušeditše mawatle ka go mantladima, mohemo wa Sathane, “Ke tla ba nweletša!” Gomme lewatle le be le nyamile kudu ka mpholo wa mohemo wa gagwe, go fihla sekepe se sennyane se thoma go bilokana morago le pele. Gomme go lebega o ka re dikholofelo tšohle di be di ile. Ba be ba loketše go ineela le go ya go, boyo bja bona. Eupša Kriste o be a se a ba tlogela, le ge ba be ba Mo tlogetše. Le a tseba, go a re putsa go Mo tšea mogohle re yago. Eupša karolo ye botse ya yona ke, le ge re sa dire, O sa re šeditše.

⁶³ O nametše thaba ya godimodimo A kgonneggo go e hwetša, gore A kgone go bona tsela yohle go kgabaganya lewatlekgolo, goba lewatle le lennyane, ka gore O be a nyaka go bea mahlo a Gagwe godimo ga bona, ge eba bothata e ka ba bofe bo a tla, gore A be Thušo ye e lego gona ka nako ya bothata. Ka gore leo ke Lentšu la Gagwe go dira seo, “Morena ke Thušo ye e lego gona ka nako ya bothata.” Gomme go sa kgathale se re se dirago, O boloka tshepišo ya Gagwe. Gomme O be a ba šeditše, O ba bone ba katana le mahuduo, phefo e le kgahlanong, eupša mahlo a Gagwe a be a ba šeditše.

⁶⁴ Ke be ke fela ke makatšwa ke mogwera wa ka, E. Howard Cadle, go tšwa Cadle Tabernacle ka Indianapolis. O be a le moopedi wa go tuma, e ka ba boka nna, o be a le lešaedi, eupša ka mehla o lekile go opela, “Leihlo la gagwe le godimo ga phorogohlo, gomme ke a tseba O ntšheditše.” Yeo e be e le mamoratwa wa gagwe, o e lekile, le go e leka, gomme ebile mo seyalemoyeng, gomme yo mongwe le yo mongwe o be a tla sega, gobane o be a se ne segalontšu go e opela, eupša e be e le ka pelong ya gagwe. Mohlomongwe godimo ka Letagong felotsoko bošegong bjo, moo a ilego go Boyo bja gagwe bja Gosafelego, leihlo le sa le godimo ga gagwe.

⁶⁵ Ka mehla ke be ke nyaka go opela, eupša ga ke kgone go opela gabotse ka mo a bego a kgona. Pina ya ka ya go ratega ke *Mogau Wa Go Makatša*, gobane ke mogau wa go makatša wo o mphološitšego. Ka mehla ke be ke re go bagwera ba ka, “Ge o fihla godimo mošola ka ntlongkgoparara ya gago ye kgolo, gomme wena, mosong wo mongwe o sepelela ntle mathuding a gago a ka pele gomme wa theetša tlasetlase fale ka thoko ga dithokgwa felotsoko, ka mokhukhung wo monnyane wola, o ya go kwa yo mongwe a opela, “Mogau wa go makatša! modumo o bose bjang, woo o phološitšego leratha boka nna.” O re, “Leboga Modimo, mokgalabje Ngwanešu Branham o kgonne, o—o tlase kua, yola ke yena. O kgona go opela *Mogau Wa Go Makatša* mafelelong.”

⁶⁶ Ka gore seo ke se ke dumelago gore ke mogau wa go makatša wa Modimo, wo o phološitšego leratha boka nna, o ntlitšitše ka go kopanelo ye le Yena, le Kereke ya Gagwe, le batho ba Gagwe, le ka Moya wa Modimo, ke mogau wa go makatša.

⁶⁷ E be e le seo sa go makatša...ge mathata a bona a be a nyamile kudu gomme Sathane o be a leka go budulela mohemo wa gagwe godimo ga bona le go ba nweletša ka lewatleng, gore šo O a tla a sepela godimo ga meetse, a sepelela thwi ka sekepeng, yona Thušo ye e lego gona ka nako ya bothata, e loketše go ba thuša. Eupša selo sa go tla e bile, ebile le ka bothateng bja bona, ba be ba Mmoifa, ba naganne O be a le mo—mo moya, goba ge re ka e bolela lehono, sepoko, goba se sengwe seo e lego semaka. Ba Mmone a sepela gomme ba Mmoifa.

⁶⁸ Gomme go nyakile go ba selo sa go swana lehono. Ga se A tlogela Kereke ya Gagwe. Gobaneng, O nametše godimo kudu ka morago ga ge A tsogile go tšwa lebitleng, go fihla A le godimo kudu ka magodimong go fihla A swanetše go lebelela fase go bona Legodimo. O ka godimo ga Morongwa yo mongwe le yo mongwe, Morongwamogolo yo mongwe le yo mongwe, gomme O a re šetša, O tseba mathata a rena.

⁶⁹ Ka morago ga ge barutiwa bale ba dutše fale, le go bolela ka mehlolo ya Gagwe, mo seripagareng sa iri ba be ba e lebetše; ba Mmone a šoma lebaka la ngwaga wo mongwe le seripa goba bontši, gomme ba lebetše mehlolo ya Gagwe. Gomme ge ba bone Selo se nnoši seo se tla ba thušago, ba goeditše gore E be e le se sengwe sa sepoko, ba be ba boifa go nagana gore E be e le Morena wa bona a etla go ba thuša, eupša ba be ba Mmoifa.

⁷⁰ Re bile le nako ye ntši go e nagantšhiša go feta ka mo ba dirilego, ka gore re badile ka go Puku ya Gagwe ya mehlolo ya Gagwe le ya tshepišo ya Gagwe ya se A rilego O tla se dira, le baprofeta ba ba profetilego gore ka go letšatši le la mafelelo O tla dira dilo tše ka meriti yohle le maswao a go Tla ga Gagwe. Gomme ba bantši ba lebelela godimo ga yona, le go re, “E swanetše go ba bomoya. E swanetše go ba go bala monagano.”

⁷¹ Gomme ba boifa Modimo wa Legodimo ka morago ga go bala ka Pukung ya Gagwe, le go ruta ka diseminarang tša rena, le go bolela le ba go fapana ka botho bja Gagwe le kgaogelo ya Gagwe le se A se dirilego, le go tseba gore O tshepišitše gore O tla e dira gape, go tseba gore O rile, “Mediro ye ye Ke e dirago, le tla e dira le lena. Lebakana le lennyane gomme lefase le ka se Mpone gape, efela lena le tla Mpona, gobane Ke tla ba le lena go fihla bofelong bja lefase.”

⁷² Ka go iri ye re phelago ka go yona bjale, gomme go na le bothata ka seatleng se sengwe le se sengwe, ga go lefelo go ya go lona, bolwetši bo pitlagana thata kudu kgahlanong le diphatišišo tša rena tša saense go fihla ba se ne dihlare tšeo di tla kgwathago malwetši, gomme lebelo la athomo, lebelo la misaele, lefase le a šikinyega, kereke ka seemong se e lego ka go sona, gomme Jesu o tla a sepelela thwi godimo kgauswi le tshepišo ya Gagwe go rena. Jesu wa go swana yo a sepetšego lewatleng bošegong bjola o sepelela thwi ka gare, go tšwa Beibeleng, go ya ka phuthegong.

⁷³ O ka kgona go ya wa mpitša mopshikologimokgethwa, go le bjalo, eupša ke ikwela boka go goelela, ee, mohlomphegi. Kriste wa Beibele, Modimo wa histori, a sepelela thwi ka phuthegong godimo ga tshepišo ya Gagwe ya tsogo ya Gagwe. Lebitla ga se le kgone go Mo swara, lehu ga se le kgone go Mo swara, hele ga se e kgone go Mo swara, go be go se sekgoa go Mo swara, o kgaotše ditlemo le go sepelela ntle. Gomme lehono O re, “Gobane Ke a phela, le a phela le lena. Ke tla ba le lena, ebile go fihla bofelong

bja lefase. Gomme mediro ye Ke e dirago, le tla e dira le lena,” go sepelela thwi ka gare godimo ga tshepišo ya Gagwe.

⁷⁴ Gomme kereke e a goeletša, “Oo, ke a makala ge eba Ke Momethodist, ke a makala ge eba Ke Mobaptist, ke a makala ge eba Ke se.”

⁷⁵ Kriste ke Kriste, Yena ke Modimo wa bohle! O le rata bohle, Mamethodist, Mabaptist, Mapentecostal le bohle. Le se Mmoifeng. Selo se nnoši go se dira ke go dira se, boka ba dirile, ba thoma go bolela le Yena, yeo ke tsela ya go e hwetša. Thoma go bolela gomme o re, “Morena, ke badile gore O e tshepišitše, ke badile gore O e dirile. A yo ke Wena?”

⁷⁶ O tla araba morago boka A dirile go bona. Mantšu šea A tla a bolelago go wena, se sengwe boka se: “Ebang ba tlhohleletšo ye botse, ke Nna, gobane Ke a swana maabane, lehono, le go ya go ile.”

A re rapeleng.

⁷⁷ Morena, wa go swana maabane, lehono, le go ya go ile, Wena ka mehla o Kriste, ka mehla o na le batho ba Gago. Re bolela ka Wena bjalo ka ge ba dirile, a re se boifeng eupša re be le dipelo tša rena di bulgile. [Ga go selo go theipi—Mor.]

⁷⁸ O tla tsoša lerole gape, gomme re tla ba le mmele boka mmele wa Gagwe Mong wa letago. Sepelela ka dipelong tša batho ba Gago bošegong bjo, Morena, ka ditshepišo tša Gago. Gomme a nke re bone seatla sa Gago se maatla se sepela magareng ga rena, gomme re ka se boife, eupša re tla phagamišetša dipelo tša rena go Wena ka tebogo, le bolebo, le thabo le go tumiša Modimo wa Legodimo, Yo a rometšego go rena phološo ka Morwa wa Gagwe, Jesu Kriste. Re neela borena go Wena, Morena.

⁷⁹ A nke Moya wo Mokgethwa bjale o tšee molaetša wo o rerilwego le go o nweletša ka dipelong tša batho. Gomme a nke ba bone gore Modimo yo a sepetšego godimo ga lewatle la ledimo, gomme, ge mohemo wa mpholo wa Sathane o be o hudua meetse. Morena, ka go katlego ya rena ye kgolo, Sathane o buduletše mohemo wa gagwe wa mpholo gape, gomme o rile, “Matšatši a mehlolo a fetile. Ga go selo se sebjalo bjalo ka Moya wo Mokgethwa. Ga go selo se sebjalo bjalo ka tswalo ye mpsha.” Morena Modimo, sepelela ka gare go ditshepišo tša Gago, gomme o laetše batho ba Gago gore O sa phela, gomme ba phološe go tšwa go mohemo wa Sathane. Ka gore re a e kgopela, Leineng la Jesu. Amene.

⁸⁰ Ka mehla, ke tla fa pitšo ya aletara ka nako ye, eupša ke ya go swara yeo nakwana feela. Go ka no ba basetsebjale ba bangwe magareng ga rena ba ba sa tsebeggo Morena wa rena, gore ga se ba ke ba Mo amogela bjalo ka Mophološi wa bona. Ba badile dipuku ka yona, gomme ba badile se ba bangwe ba se boletšego, le go ya pele, eupša ka kgonthe go tseba gore O gona, a re boneng ge A ka tišetša thero ye bošegong bjo, gore O sa le Jesu, gore kanegelo ga

se kanegelo ye e sego ya nnete, gore O hwile, gomme ba utswitše mmele wa Gagwe gomme ba rile O tsogile go tšwa bahung. Ge go le bjalo, bodumedi bja rena ga bo fete Bomohammedan goba e ka ba eng gape. Eupša Kriste wa rena o a phela bošegong bjo gomme o tla tlišetša Lentšu le lengwe le le lengwe leo A le boletšego go ba therešo.

⁸¹ Bjale, ga se rena Kriste, re no ba bahlanka ba Gagwe. Go boleleng bošegong bja go feta, ke be ke bolela ka baprofeta, gore ka fao ba tlotitšwego kudu ka Moya wo Mokgethwa gore ebile ba boletše o ka re e be e le bonabeng, boka Dafida a goeleditše, “Modimo wa Ka, o ntlogeletšeng?” E be e se Dafida, o be a se a tlogelwa, eupša e be e le Moya wa Kriste ka go yena o goeletša. E be e le Kriste a bitša go tšwa go Dafida; Modimo a itlhagiša Yenamong ka baprofeta bale.

⁸² Gomme seo se dirilwe bjang? Ka tlase ga madi a tšholotšwego a sethole goba kwana. Ge A kgonne go tlotša batho ka tlase ga poelano yela ya madi a tšholotšwego a dikwana le dithole, le go kgona go ba dira ba bolele tlwa therešo le go hlagiša thato ya Gagwe, ke bontši gakaakang A ka kgonago go e dira ka tlase ga Madi a tšholotšwego a Ngwana wa Gagwe Mong, Jesu Kriste? Tšea kereke ye e hlwekišitšwego gomme o e phuthele ka go Moya wa Gagwe go fihla Moya wo Mokgethwa o tšea kopano ka taolo ya go felela le go šoma thato ya go tlala ya Modimo. A re direng seo bošegong bjo, ngwanešu, kgaetšedi, ge re sa Mo rapela.

⁸³ Ga se nna mofodiši yo Mokgethwa, ke nna ngwanabolena. Ke a dumela gore Modimo o boloka tshepišo ya Gagwe. Gomme ge Modimo a ka tla bošegong bjo le go boloka ditshepišo tšela go bontšha gore O a phela, gona gore bodumedi bja rena ga se se sengwe sa lefeela. . . Bjale, lebaka leo ke dumelago ka go Kereke ye, Kereke ya Moya wo Mokgethwa, ke ka gobane Jesu o swanetše go tseba mokgwa wa go beakanya kereke, gomme Jesu o boletše gore mediro ye A e dirilego, kereke ye e dumetšego ka go Yena e tla dira mediro ya go swana.

⁸⁴ Paulo o rile, “Ge go etla yo motee magareng ga lena gomme lena bohle le bolela ka maleme gomme—gomme go se tlhathollo,” o rile, “mosedumele o tla re, ‘Le a gafa.’ Eupša ge yo motee a bolela a profeta, gomme a utolla sephiri sa pelo gona bohle ba tla wela fase, le go re, ‘Modimo o na le lena.’”

⁸⁵ Lenaneo la Kereke ya Kriste, e sego meletlo ya bodumedi, eupša Bogona bjo bo phelago bja Kriste yo a tsogilego, yeo ke Kereke ya Modimo yo a phelago, Modimo a phela ka Kerekeng ya Gagwe, a phela Bophelo bja Gagwe, le go dira ka Kereke ya Gagwe, a bolela Yenamong ka bahlanka ba Gagwe bjalo ka ge A dirile ge A be a le mo lefaseng.

⁸⁶ Re ka no dumelela dipelo tša rena go phuthelwa kudu ka go Yena, gomme moya wa rena bjalo ka tlase ga taolo, gore A kgone go sepelela ka gare le go tloša go nagana ga rena beng, le go no

dira go nagana ga rena, go tiišetša Lentšu la Gagwe, gona re tla tloga le go re, “Ka therešo, Modimo o na le rena.”

A re rapeleng gape.

⁸⁷ Morena, bjale tirelo, Lentšu le tlile gobane O Le ngwadile, gomme Le swanetše go rerwa lefaseng lohle bakeng sa hlatse. Gomme, Morena, ge *Le* e le Lentšu la Gago, leo ka potego re Le dumelago, O tla phethagatša tshepišo ye nngwe le ye nngwe ye O e tshepišitšego.

⁸⁸ Gomme ke rapela Wena bošegong bjo, Morena, legatong la modiradibe yo a lego mo, yo a sa Go tsebego, a nke monna goba mosadi bošegong bjo ba bule dipelo tša bona ka seemong sa bona sa go tshwenyega gobane, “Ga go na khutšo go ba ba lapilego,” go boletše Modimo. Modiradibe o bjalo ka lewatle la go tshwenyega, ga a na khutšo, mohemo wa diabolo o buduletšwe go yena iri ye nngwe le ye nngwe ya letšatši, gomme ga go lefelo go yena go ya ka go seemo sa gagwe sa sebe. Eupša go na le yo Motee Yo a kgonago go bolela le maphotho le go homotša le go budulela morago mohemo wo mongwe le wo mongwe wa ditšhila wa Sathane, gomme a ka tsebiša motho yo, gore lerato la Modimo le gapeeditše Jesu kudu go fihla A tlile lefaseng go hwa go phološa monna goba mosadi. A nke ba e amogele bošegong bjo, Morena.

⁸⁹ A nke balwetši, ka mmero o tee, ba dumele go Wena. A nke difofu di bone, difoa di kwe, dimuma di bolele, digole di sepele, gomme Modimo a tagafatšwe.

⁹⁰ Šegofatša baena ba ba direlago ba dutšego mo, Morena, ba ba diretšego mengwaga bakeng sa wona morero wo, ba bethile tsela, ba bea makgwara, gomme ba a batela. Bjale a nke Moya wo Mokgethwa o sepele go theoga tsela ye o tiišetša gore se ba se tshepišitšego batho ka Lentšu, a nke se tiišetšwe go rena. Ka gore re a e kgopela, Leineng la Jesu. Amene.

⁹¹ Re ya beke ye, ge Morena a dumelela . . . Ka therešo ke, ke letetše phetogo ye kgolo ka bodireding bja ka gonabjale, go fihla seo se etla, se diregile gatee, go fihla se etla, ke tla dula le bodiredi bja ka bja mehleng. Eupša, oo, ge e ka no direga beke ye, go tla ba le go šikinyega go kgabola naga ye, ke a le tshepiša, gore ga se la ke la lora ka yona, gomme kereke ye kgolo ya Modimo ye e lopolotšwego e tla tšea mosepelo go ya pele. Elelwang ke a e bolela: O RIALO MORENA. Ge e ka no direga bjale!

⁹² Ge ke bile le bodiredi bja go no tšea diatla tša motho le go boloka monagano wa ka o se wa tia go fihla A boletše, e be e le ka Queen City, ka Regina, Saskatchewan, bošego bjo bongwe ge monna a sepetše go kgabaganya sefala gomme Moya wo Mokgethwa o tshepišitše gore O tla utolla sephiri sa pelo . . .

⁹³ Ke ba bakae ba ntsebilego mola ke bile le bodiredi bja ka bja mathomo go kgabola Lebopo la Bodikela mo? Ke ba bakae ba bona ba go swana ba tla phagamišetšago diatla tša lena godimo

le go bolela gore le nkwele ke bolela gore Moya wo Mokgethwa o mpoditše gore go tla direga, gore ge ke hlokofala, e sego go ba sejato ka tšhelete, gomme—gomme e sego go ba, go leka go ba motho tsoko yo mogolo, eupša go kokobela le go boloka bonnyane le botlase, gore O tla mpha mpho go tseba sephiri sa pelo? Ke ba bakae ba tsebago gore ke rile seo se tla direga? Bjale seo se diregile. Bjale, O ntshepišitše, “Boloka go kokobela, gomme Ke tla dira go fetiša, ka botlalo.” Gomme e thwi mo go dirweng gonabjale, kafao e ka direga nako efe kapa efe.

⁹⁴ Re ya bošegong bjo go bitša mothalo wa thapelo. Ke a dumela Billy o mpoditše gore o file dikarata tša thapelo. Re tla fa tše bošego bjo bongwe le bjo bongwe go fihla re...se sengwe se direga. Le se foše bošego, dulang le sona. Gomme ge o se Mokriste, eba Mokriste bošegong bjo. Ge o se ne Moya wo Mokgethwa, O amogele bošegong bjo gore o kgone go tsoena ka gare le rena. Ga o ne bontši botelele go šoma.

⁹⁵ Bjale, re ka se kgone go bitša ka go methalo ye ya se re se bitšago tlhatho. Ke ba bakae ka fa ba se nago karata ya thapelo? A re boneng diatla tša lena, gomme le a babja, ga le na dikarata tša thapelo eupša le a babja, phagamišetšang diatla tša lena godimo, mogohle ka moagong. Go lokile. Ga o hloke karata e ka ba efe ya thapelo.

⁹⁶ Le a bona, le elelwa ka go molaetša wo bošegong bjo, ga ke nagane ke na le woo ka gare, eupša moo mosadi a kgwathilego morumo wa kobo ya Gagwe, morago ga ge A fihlile lešing ka lehlakoreng le lengwe, o kgwathile kobo ya Gagwe, gomme O retologile go dikologa, gomme o rile, “Ke mang a Nkgwathilego?” Gomme O lebeletše go dikologa gomme fale, yo mongwe le yo mongwe o be a Mo kgwatha, eupša O rile, “Ke a bona gore Ke fokotše, bokwala” bjo bo rago *maatla*, “bo tlogile go Nna.” Gomme O lebeletše godimo ga batheeletši go fihla A hweditše mosadi yo monnyane le go utolla go yena bothata bja gagwe, gomme o mmoditše *tumelo ya gagwe* e mo phološitše. Bjale, Jesu yola wa go swana, ke Yena wa go swana.

⁹⁷ Ge Moya wo o lego ka go mosepelo wo wa Pentecostal, goba mosepelo wo wa letšatši la moragorago, ge o sa dire mediro ya go swana yeo A e dirilego, gona ga se Moya wa Kriste. Ge banna ba, le dilo, ba no fora, le go bolela gore ke go thantshelwa gobane ba a thaba, le go bolela ka maleme, le go ya pele, ge seo e no ba bofori, seo ke sohle se tla bago; eupša ge e le Moya wa Kriste, O tla iponagatša Yenamong le go netefatša Yenamong, gore Yena ke Kriste wa Testamente ye Mpsha.

⁹⁸ Re ka se kgone go bitša ba bantši kudu ka nako e tee. Kafao, ke a dumela o rile o thomile ka karata ya thapelo A, tee go fihla go A, masometlhano goba lekgolo, ga ke elelwe, eupša, golebjalo, a re thomeng ka karata ya pele, karata ya thapelo nomoro tee. Ge o ka kgona go ema ka maoto a gago, etla godimo ka lehlakoreng

le, mokgomana fao. Nomoro pedi, ge o ka kgona go ema ka maoto a gago, karata ya thapelo nomoro pedi. Ke a dumela yeo e be e le A. A, nomoro pedi, thwi godimo fa, ge e le mohumagadi. Nomoro tharo, nomoro nne. Yeo ke nnete. [Ga go selo go theipi—Mor.]

⁹⁹ . . . bidišwe ke kereke, goba go ya pele, ba kgethilwe ke Modimo. Baapostola, ba bobedi, baprofeta, ba boraro, nka no se be le ba ba beilwe mothalong feela gabotse, ba boraro ke a nagana ke barutiši, le baebangedi, le badiša. Diofisi tše tlhano tša semoya ka kerekeng go bea kereke ka lenaneo: Baapostola, baprofeta, barutiši, baebangedi, badiša, tseo di bitšwa diofisi ke Modimo. Ka gona ka phuthegong ya selegae, go na le dimpho tše senyane tša semoya tše di šomago magareng ga batho.

¹⁰⁰ Bjale, ka diofising tše le mafelo, ka diofising le kwa go tšwa go moapostola, bodiredi bja gagwe. Le kwa go tšwa go moprofeta, bodiredi bja gagwe, go tšwa go baebangedi, go tšwa go morutiši, go tšwa go modiša. Yo mongwe le yo mongwe o na le bodiredi bjo bo aroganego. Gomme mabodiredi a bona ke a Modimo. Modimo o ba beile ka kerekeng bakeng sa morero wo.

¹⁰¹ Ka gona Modimo o tla fase ka sebopego sa Moya wo Mokgethwa magareng ga phuthego ya Gagwe, a bolela ka maleme, yo mongwe o a hlatholla le go botša motho yo a itšego selo go se dira, gomme se direga ka tsela yeo. Mohlomongwe seo se tla ba nako ye nngwe ge go be go le tlhoko. Ke moka go ne dimpho tša bohla, tsebo, ditlhathollo, mehuta yohle ya dimpho tseo di yago ka kerekeng. Eupša tsela ya pele, le yohle ya yona, e swanetše go tla pele ka Lentšu, Lentšu.

¹⁰² Bjale, ge nka kgona go fodiša mothalo wo wa batho, goba batho ba ntle mo, ka nnete ke tla e dira, eupša nka se kgone. Eupša ka gobane, lebaka ke sa kgonego, ke ka gobane ba šetše ba fodišitšwe, ba fodišitšwe ge e sa le Jesu a hwetše phodišo ya bona. Bjale, selo se nnoši seo re ka kgonago go se dira ka diofisi tše ke go hlagiša Kriste go lena, gore le tla bona gore O ka go Lentšu la Gagwe, a boloka tshepišo ya Gagwe, gomme ka gona ka tumelo ya gago mong o amogela Jesu bjalo ka Mofodiši wa gago gomme o fodile, yeo ke tsela ye e šomago. A yeo ke nnete, baena? Ke a dumela motho yo mongwe le yo mongwe o tla fa bohlatse go seo. Banna ba ba rera Ebangedi, o dumela seo, e amogele, e no ba ye botse bjalo ka e ka ba efe. . . yeo ke ye kaonekaone. Goba morutiši, modiša, moebangedi, moapostola, moprofeta, e ka ba eng e ka bago, ke go šoma gohle ga Moya wo Mokgethwa magareng ga batho ba Gagwe.

¹⁰³ Bjale, ga ke moreri kudu, ga ke ne thuto e ka ba efe, nka se kgone go tšea lefelo la bona, bona ke barutiši, badiša, le go ya pele. Eupša Morena o mphile mpho ya tlhatho, mpho ya seprofeto yeo bontši goba bonnyane bo bilego ge e sa le ke le mošemane yo monnyane, le go nthoma, sebakeng sa go ba le tsebo ya ka ya Beibele, ke ka lebaka leo ga ke rere Thuto magareng ga lena,

nka no se tsebe go lekanela ka yona. Ke a tseba ke phološitšwe, nka kgona go le botša ka fao ke phološitšwego, morago botšišang modiša wa lena ka moka ga yona. Gomme ke a tseba gore O a fodiša, gomme ke a tseba O tlatša ka Moya wo Mokgethwa. Ke hlatsetše dilo tšeo tšohle, gomme seo ke seo nka go botšago ka nnete seo ke therešo. Gomme le hwetša bontši bjoo, gona modiša wa lena o tla le tšea go tloga fao go ya pele.

¹⁰⁴ Bjale, fa go eme batho ka go mothalo wo wa thapelo, bokgole bjo ke tsebago yo mongwe le yo mongwe ke basetsebje go nna. Ke ba bakae ka moagong wo ba tsebago gore ga ke le tsebe, goba ga ke tsebe selo ka lena, boka mathata a lena, malwetši, goba eng gape, phagamišetšang diatla tša lena godimo, gohlehohle moagong, mogohle. Gabotse, ke a thanka, e no ba e ka ba lekgolo la phesente. Gabotse gona, ga ke go tsebe. Bjale, mohlolo ke eng? Mohlolo, ke se sengwe seo se ka se nagantšhišwego. A yeo ke nnete? Ke se sengwe re ka se kgonego go se nagantšhišwa, saense e ka se kgone go se netefatša.

¹⁰⁵ Kafao gona ge Jesu Kriste, Yo re rerilego ka yena bošegong bjo, le baapostola ka sekepeng ba bolela ka se A se dirilego, gomme O tshepišitše Kereke ya Gagwe gore maswao a a tla ya pele le Kereke go fihla A etla gape, gona ge A le ka Kerekeng ya Gagwe gomme ka therešo re emela Kereke ya Gagwe, bjalo ka palo ya dikerekemaina eupša Kereke ya Gagwe, gona O tla dira magareng ga rena bošegong bjo go swana le ge A dirile nako yela. A yeo ke nnete?

¹⁰⁶ Ga se nke ka ke ka ba le Yena go botšiša kerekeleina e ka ba efe go nna. O tla ba botša ke kerekeleina efe ba tšwago go yona, le go ya pele, eupša ga A tsoge a re ba phošo goba ba nepile. A o kile wa e kwa? Le gatee, aowa. O modumedi. Ge o le modumedi, o modumedi; ge o se modumedi, o no se be modumedi. Kafao seo ke se Modimo a se kgopelago, ke ge eba o modumedi goba aowa. [Ga go selo go theipi—Mor.] “. . . tla phološwa, yo a sa dumelego o tla ahlolwa.”

¹⁰⁷ Bjale re ya go lokologanya mothalo wo wa thapelo. Ke nagana yo mongwe le yo mongwe wa bona o phagamišitše diatla tša bona, gore ba be ba le basetsebje. Bjale, ge Moya wo Mokgethwa o ka šoma ka batho ba, le lena ntle kua ba le se nago dikarata tša lena tša thapelo, goba e ka ba eng gape, gomme o tla utolla fa feela boka rena. . . baapostola ba be ba bolela ka therong ya rena bošegong bjo, ke ba bakae ba tla Mo dumelago, le go Mo amogela, le go bolela gore ke therešo, le go tloga ba dumela? A re boneng dipelo tša lena go Modimo. Morena a le šegofatše.

¹⁰⁸ Tate, bjale ka diatleng tša Gago re neela tirelo ye. Ga go motho godimo ga sefahlego sa lefase, Morena, ga go le o tee wa rena a ka kgonago go dira se, E tla ba Wena. Kafao bjalo ka ge re boletše gore baprofeta ba kgale ba be ba tloditšwe kudu ka

tlase ga poelano yela, gore ba bone dipono, gomme Jesu o boletše Yenamong, “Ga se Nna yoo a dirago mediro, ke Tate wa Ka yo a dulago ka go Nna. Ke dira seo, ka mehla, se se Mo thabišago. Ruri, Ke re go lena, Nka se kgone go dira selo ka go Nnamong, eupša se Ke bonago Tate a se dira, seo Morwa o se dira go swana.”

¹⁰⁹ A nke go be bošegong bjo, Morena, gore ba tla bona mediro ya Modimo e bonagatšwa ka Kereke ya Gagwe. Gomme a nke re ineele renabeng le go gafelwa kudu go Wena, gore meboya ya rena e tla bitša le go bolela mantšu ao O tla ratago re a bolela. Re kgopela se bakeng sa letago la Gago. Gomme a nke modiradibe yo mongwe le yo mongwe, mosedumele yo mongwe le yo mongwe a phološwe bošegong bjo le go ikgafela go Wena ka lebaka la yona, gomme motho yo mongwe le yo mongwe a babjago o fodišwe. Leineng la Jesu. Amene.

¹¹⁰ (Go lokile, e ka ba kae le nyakago go dula, baena, go lokile, le nyaka go tla godimo.) Ke nyaka le no ba tlhomphokgolo ka mo le kgonago. Dulang go homola ka kgonthe, theetšang, gomme nno ikgafelang lenabeng go Modimo.

¹¹¹ Bjale, e nong go elelwa se: Ge Moya wo Mokgethwa o ka tla mo le go dira dilo tše, gabotse gona le tla nyaka go ba komana go e amogela. A yeo ke nnete? A tšeo ke dipelo tša lena? A seo ke se le se nyakago? A o nyaka Kriste ka bophelong bja gago? Gona Lentšu le bonolo le re ruta mokgwa wa go e dira. E dumele, e amogele, gomme ka gona e tla ba.

¹¹² Bjale, mang kapa mang mo a ka tsebago gore ga go maatla ka go monna yo a ka kgonago go dira godimo ga monna yo se ke badilego ka sona bošegong bjo ka Lentšung, ntle le ge Modimo Yenamong a ka tla gomme a se dira. Bjale, le se lebele thuto ge re sa ya pele. Barutiwa ba be ba lebetše, Beibele e rile dipelo tša bona di be di thatafaditšwe gomme ba lebetše ka dihlapa le dillofo. Bjale, ge o hloka, o se lebele thero, elelwang O dula a le Kriste bošegong bjo bjalo ka ge A bile nako yela.

¹¹³ Bjale, ka go molaetša wa rena bošegong bjo re hweditše moapostola Petro, yo re mo tsebago go ba bjale, yo a bitšwago Simone, a bitšwago *Petro*, “letlapa le lennyane,” ke Jesu, o kopane le motho, o kopane le Yena, gomme o boletše le yena le go mmotha ka maemo a gagwe, o mmoditše leina la gagwe, le go ya pele, gomme o dumetše go Yena. A yeo ke nnete? O boditše mosadi mo sedibeng dibe tša gagwe, o dumetše go Yena. Gomme o boletše ka dilo tša go fapana, tšeo, malwetši a batho ba bilego le wona, gomme ba dirilwe go fola ka tumelo ya bona. A yeo ke nnete? Gobane Jesu o ba boditše.

¹¹⁴ Gomme thwi mafelelong, barutiwa ba Gagwe, mafelelong mahlo a bona a bulega, gomme ba rile, “Bonang, bjale re a dumela gore O tseba dilo tšohle, gomme bjale ka se re a dumela gore O Yena.”

115 Jesu o rile, “A bjale le a dumela?” Le a bona? Ka morago ga nako yeo yohle ya go sepela le Yena, le dilo, e ile ya fihlelelwa.

116 Ke a dumela o phagamišitše seatla sa gago, mohlomphegi, gore re be re le basetsebane seng sa rena. Ee, mohlomphegi, re bona. Go lokile, bjale monna yo a emego fa ke mosetsebje go nna, gomme ke mosetsebje go yena, ga se ra ke ra kopana ka maphelong a rena, le ke lekga la rena la mathomo. Selo se nnoši, yo mongwe, Gene, Leo, Billy, goba ba bangwe ba bona, ba mo fa karata ya thapelo, nomoro ya gagwe e biditšwe gomme o fa mo sefaleng.

117 Bjale, ga ke tsebe se a lego mo bakeng sa sona, Ga ke na le kgopolo ya go feta ka mo mosetsebje wa go phethagala a dirago, ga ke tsebe, Modimo o a tseba. Bohle re amogela seo, gore Modimo o a tseba. Gomme ka gona ge Modimo a ka . . . Ge nka no ineela nnamong go Modimo go lekanela go Mo dumelela go bolela le monna yo ka nna, go tla ba boka Moya wa go swana, E be e se Dafida ge a goeeditšwe, “Modimo wa Ka, O Ntlogeletšeng?” E bile Kriste a goeletša ka Dafida, “O Ntlogeletšeng?” Le kwešiša seo?

118 Bjale, ke ba bakae ka fa bao ba sa nkago ba ba ka go ye nngwe ya dikopano pele, a le ka phagamiša diatla tša lena? Ga se wa ke wa ba ka kopanong pele. Diatla tše ntši. Morena a le šegofatše. Ke a tshepa gore se se tla ba go kgodiša go lena. Gomme ge o le mo lekga la gago la mathomo le go ba le tlhoko ya Modimo, dira boka mosadi a dirile, e re . . . O fetile lešaba gomme a kgwatha morumo wa kobo ya Gagwe.

119 Bjale, o ka kgona go kgwatha kobo ya Gagwe bošegong bjo. A le dumela seo? O ka kgona go kgwatha kobo ya Gagwe, gobane Yena ke Moprsta yo Mogolo, gonabjale, yo a kgonago go kgwathwa ke maikutlo a mabofokodi a rena. A yeo ke nnete? Gabotse gona, ge A le Moprsta yo Mogolo, Moprsta yo Mogolo wa go swana, O tla dira ka tsela ya go swana A dirilego ge A be a le mo lefaseng, ge A swana maabane, lehono, le go ya go ile. A yeo ke nnete? O tla dira ka tsela ya go swana. Kafao wena ntle le karata ya thapelo, lebelela ka tsela ye gomme dumela ka pelo ya gago yohle.

120 Bjale, mohlomphegi, go no bolela le wena. Ga se ka ke ka kopana le wena, ga ke go tsebe, eupša Morena Jesu o a re tseba bobedi bja rena. Gomme re mo ka morero go leka go tliša Kriste go rena, mmogo. Ge nka kgona go go direla e ka ba eng gomme ka se e dire, ke tla ba monna yo sehlogo, eupša ge nka kgona go dira e ka ba eng gomme ka se e dire, ke tla ba sehlogo, eupša ge nka kgona ke tla dira. Gomme selo se nnoši nka kgonago go se dira ke, ka mpho ye Kgethwa, go no ineela nnamong go Yena le go bona se A tla se bolelago go wena, gona ke botho bja Gagwe bo šoma ka nna feela bjalo ka mohlanka wa Gagwe, gore O mpileditše morero woo.

¹²¹ Monna o apešitšwe ke moriti bakeng sa lehu. O na le kankere, o tseba seo, kankere e ka maswafong. Yeo ke nnete. Feela nakwana ye nnyane, ntle le ge Modimo a ka thuša, yeo e tla ba yona. Bjale, gore O lokile, ka nna go tsebeng seo, gore O mpoditše seo, go dira Lentšu la Gagwe therešo, a ga go? Go a dira, go dira Lentšu la Gagwe therešo.

¹²² Ke nyaka go go botšiša se sengwe: A o tla Mo amogela bjalo ka Mophološi wa gago wa sebele, bjale? O modiradibe. Gomme o Mo hloka bjalo ka Mophološi wa gago, gobane leswiswi la boima go feta kankere yela le lekeletše godimo ga gago, gomme ke nyaka go tloša moriti wola go rena. O Mo amogela bjalo ka Mophološi wa gago bjale, bjalo ka Mophološi wa gago? Phagamišetša seatla sa gago go Yena, ge o ka Mo amogela. O tšwa Sacramento fa. Yeo ke nnete, a ga se yona? O a dumela Modimo o a tseba gore o mang? Mna. Keith, eya morago gae bjale gomme o fole. O phološitšwe go tšwa lehung la gago le sebe. Modimo a be le wena, ngwanešu.

¹²³ O dumela go Morena? Bjale, o se dumelele seo go go feta. E no hemela godimo ga Gagwe, “Morena, nthomele botho bja Gago, a nke ke be le Wena, Morena.” Jesu o a phološa gomme Jesu o a fodiša. O a e dumela? Bjale, le se dumelele molaetša ka sekepeng se sennyane go tloga go lena bjale, le se dumelele pelo ya lena go thatafatšwa. Go lokile.

¹²⁴ Go lokile, mohumagadi, mo, go bile le mosadi yo a tllilego go Morena wa rena, gomme O boletše le yena lebakana le lennyane gomme o hweditše se mathata a gagwe a bego a le sona. Gomme ge o sepeletše go Yena bošegong bjo, ge A be a le mo lefaseng ka mmeleng wa nama, gomme o sepeletše godimo go Yena gomme o boletše le Yena lebakana le lennyane, O tla tseba feela mathata a gago, feela bjalo ka ge A tsebile mathata a gagwe, gomme O tla kgona go go botša mathata a gago, eupša ge o babja, A ka se kgone go go fodiša, ntle le ge o e dumetše. Leo e tla ba leswao gore O be a le fao.

¹²⁵ Bjale, O rile, “Lebakana le lennyane gomme lefase le ka se Mpone gape, eupša lena le tla Mpona.” Bjale, O tla e hlagiša bjang? “Ke tla ba le lena, ka go lena.” Bjale, ge ka therešo ke Mo emetše ka Mantšu a Gagwe, gona O tla tišetša se ke se boletšego go ba nnete. Gona O tla go botša mathata a gago, go no šomiša dipounama tša ka, seo ke sohle se lego, Ga se nna, E swanetše go ba Yena, gobane ga ke go tsebe.

¹²⁶ O tšhogile go fetiša. Gomme ka gona ka tlhahlobo go laetša gore o na le bothata bja pshio, gomme o na le bothata ka sebudula, gape. Yeo ke therešo. Ke bona bana ba babedi ba go babja ba tšwelela. O a ba rapediša, o be o ba rapediša nako ye nngwe. Ge Jesu a ka tšea segalontšu sa ka le go bolela bothata bja bana bale, a o tla Mo dumela bakeng sa phodišo ya bona? Yo motee wa bona o hloka madi, gomme yo mongwe o na le se sengwe sa phošo ka mahlo. O bile le karo bakeng sa mahlo ale,

gomme o bakeng sa karo ye nngwe bakeng sa mahlo ale. A o a dumela? Gona sepela gomme o amogele phodišo ya gago bakeng sa gago le bana ba gago, Leineng la Morena Jesu.

127 E no ba le tumelo. E no bulang dipelo tša lena bjale ka thapelo, gomme le Mo dumele, gomme le Mo amogeleng.

128 Go bjang? O na le bo—bo bothata bja mala bjo bo go tshwenyago. Gomme go na le se sengwe sa go tla ba kudu ka wena, gobane ke go bona nako ye nngwe. Go be go le ka mothalong wa ka wa thapelo, gomme o be o apešitšwe ke moriti go iša lehung ka leukemia, gomme Modimo o go fodišitše. Mdi. White, boela gae gomme bothata bja gago bja mala bo dirile, bo fodile. Modimo a go šegofatše. Modimo a go šegofatše, kgaetšedi.

129 Go bjang? Morena Jesu o ne kgaogelo kudu go rena, gomme re a Mo rapela, gomme Moya wa Gagwe wo mogolo o fa. Bjale, go na le motho yo mogolwane o tla pele ga ka go tšwa go yo... ke mmagwe, gomme o eme mo bakeng sa mmagwe. Gomme mmagwe o tlašegile ka go—go golofala, ke atheraithisi, gomme ntle le seo, o bile le strouku. Gomme ga se a phološwa, go na le moya wo moso godimo ga gagwe. Gomme o dula ka Tennessee. Yeo ke therešo. Gomme o mo emetše fa. Sepela o dumele, gomme o tla phološwa. Leineng la Morena Jesu, dumela.

130 Elelwang molaetša, bulang dipelo tša lena, Mo amogeleng ka sekepeng sa lena se sennyane ge le sesa go kgabaganya lewatle la bophelo la go hlomphega. A le Mo nyaka ka sekepeng sa lena se sennyane bošegong bjo go fediša mathata? Le se Mmoife. E no Mo dumelang.

Go bjang?

131 Ka kgonthe ke nagana go lekanetše, ba a dumela gonabjale. Ba no fodišwa ntle fale gohle tikologong. Mohlala, mosadi yo mo, go na le kgokagano le mosadi yo mo, a dutšego kua. Ebile o be o thabile gobane o biditšwe. Yeo ke nnete. Gabotse, o naganne o tla tsena nako ye nngwe, eupša ga wa swanela go dira, alesa yela e tšwa go wena, dumela, go tsupuga ga setho. Dumela ka pelo ya gago yohle, o ka ya gae gomme wa fola.

132 O kgwathile eng? O kgwathile mang? Mopriska yo Mogolo, Jesu yo a phelago.

133 Kgaetšedi yo o be a le bothateng, bothateng go tsenelela, karo, karo ya lehu, kankere. Gomme e go tlogetše ka go se—se seemo sa go robega, boka letšhogo le go hloka boroko, gomme mahlo a gago a go tshwenya, le ditlhakahlakano. O tšwa Florida, naga ye borutho ka kgonthe. Ruthe, boela morago Florida, gomme o dirwe go fola, Leineng la Morena Jesu.

134 A le dumela ka dipelo tša lena tšohle? “Ge o ka kgona go dumela!”

135 Bjale, a o a dumela bothata bja mokokotlo bo go tlogetše ge o etla godimo sefaleng? Go lokile, gona tloga, gomme o re, “Leboga

Morena,” gomme dumela ka pelo ya gago yohle gomme o dirwe go fola.

¹³⁶ O itia diatla tša gago bakeng sa eng? O a Mo rata? Gona bothata bjoo bja proseteite bo go tlogetše, ngwanešu. Emelela ka maoto a gago gomme o fe Modimo tumišo.

¹³⁷ Mokokotlo wa gago, mathata a pshio a go tlogetše, le wena, kgaetšedi, eya pele tseleng ya gago o hlalala, o re, “Ke a Go leboga, Morena.” Fola.

¹³⁸ Oo, bjale ke . . . bjale o a dumela. Bjale Moya wo Mokgethwa o . . .

¹³⁹ Bothata bja sehumagadi, bothata bja sesadi. Dumela ka pelo ya gago yohle, sepela gomme o fole Leineng la Morena Jesu.

¹⁴⁰ Morena o fodiša bolwetši bja swikiri le go ba dira ba fole, a o dumela seo? Sepela, dumela ka pelo ya gago yohle gomme o fole, Leineng la Morena Jesu.

¹⁴¹ Gape O fodiša bothata bja mogodu. Sepela o je, fola, dumela go Morena Jesu Kriste ka pelo ya gago yohle.

¹⁴² Gape O fodiša bothata bja pelo. E no ya pele tseleng ya gago, gomme o re, “Ke a Go leboga, Morena Jesu.”

¹⁴³ O fodiša bolwetši bjola bja letlalo bo dutšego fale bakeng sa gago, le bjona, ge o e dumela. Yo mogolo yola, monna yo boima a dutšego fale o be a rapela, moratwa wa gagwe o be a mo rapediša, o a e dumela, ngwanešu? Phagamišetša diatla tša gago godimo gomme o Mo amogele. Eya, o fole.

¹⁴⁴ A le a dumela, ntle ka go batheeletši? Lena bohle le a dumela? Oo, ye ke nako! Moya wo Mokgethwa! Go ka direga eng gonabjale? Go lokile.

¹⁴⁵ Mo, go na le morethetho o tšwa go batheeletši, go tšwa go mošemane yo. Ga ke go tsebe, morwa, Modimo o a go tseba. O mo bakeng sa go kgohlola ga asma. Yeo ke nnete, ke therešo. O tšwa Arizona mo. Yeo ke nnete. Papa le mama ba dutše ntle fale. Ba be ba nyamile gobane ga se ba hwetša thapelo ya bona . . . ba ne karata ya thapelo, eupša e be e se ya bitšwa. Ge Modimo a ka kgona go mpotša mo bothata ke eng ka mama le papa, a o tla ya wa bea diatla tša gago godimo ga bona, ba tla fola? Mama o na le bothata ka molaleng wa gagwe, papa o na le go tsupuga ga setho. Eya o bee diatla tša gago godimo ga bona, morwa, Leineng la Morena Jesu.

¹⁴⁶ Le a dumela ka pelo ya lena yohle? Ge le dumela, emelelang ka maoto a lena gonabjale, yo mongwe le yo mongwe wa lena. Fa, lena ka go mothalo wa thapelo, dirang selo sa go swana fa, yo mongwe le yo mongwe wa lena. Gonabjale ke nako. (Eya, bea diatla tša gago godimo ga bona, hani, gore ba fole.) Beanang diatla seng sa lena.

¹⁴⁷ Morena Jesu, ke a rapela bjale, ka tlhompho, ka tlhomphokgolo, Leineng la Jesu Kriste, gore O tla fodiša motho yo mongwe le yo mongwe a babjago a lego fa. A nke maatla a Modimo ao a tsošitšego Jesu, gore O sepeletše thwi ka sekepeng sa rena se sennyane bošegong bjo, a homotša maphotho, a rakela mohemo wa ditšhila wa Sathane kgole, wo o boelago gore ga A swane. O a swana, go swana ka motheo, go swana ka maatla, go swana ka letagong, go swana ka go tšohle, Jesu wa go swana. Ke rapela thapelo ye ya tumelo bakeng sa batheeletši ba bakeng sa phodišo ya bona, Leineng la Jesu Kriste Morwa wa Modimo.

¹⁴⁸ Bjale, go lena ba le amogelago phodišo ya lena, phagamišetšang diatla tša lena godimo. Bjale, lena ka mothalong mo, a le ka kgona go e amogela ka mokgwa woo? A le ka kgona go e amogela godimo ga motheo woo, thwi go theoga mothalo? Phagamišetša seatla sa gago godimo.

¹⁴⁹ Bjale, ke nyaka modiradibe yo mongwe le yo mongwe yoo a sego. . . ka fa, yoo a sa tswalwago ke Moya wa Modimo, etla mo motsotso feela gomme o eme mo, gomme a re go rapelele nakwana feela. Motho yo mongwe le yo mongwe ka fa yoo a sego Mokriste, a o ka tla pele ka Bogoneng bja Modimo? A o ka tla mo le go neela bophelo bja gago go Morena wa rena Jesu? Ke tla go tshepiša se: o ka se tsoge wa ba bokgauswana e ka ba bofe go Yena go fihla o kopana le Yena sefahlego ka sefahlego, gobane wo ke Moya wa Gagwe. Modimo a šegofatše banna ba babedi ba ba tlogo bjale, ba bangwe ba ba tlogo mo. Modimo a le šegofatše ge le sepela thwi tlase fa feela nakwana.

¹⁵⁰ Etlang gomme le kwe, etlang gomme le dumele go Morena. Ka Bogoneng bja Gagwe bjale sepelelang tlase mo bjale, lena ba le sego la ke la amogela Kriste gomme le Mo nyaka bjalo ka Mophološi wa lena wa sebele, le nyaka boitemogelo, le nyaka go tseba gore le phološitšwe, etlang fase bjale. A le ka se tle? Ke a le laletša ka Bogoneng bja Modimo, ka pitšo ya Moya wo Mokgethwa, wo o rilego go nna feela bjale, “Dira pitšo ya gago ya aletara bjale, ka gore go na le ba bangwe bao Ke ba bitšago.”

¹⁵¹ Ge ke le mohlanka wa Gagwe, ge Moya wa ka e le wa Gagwe yo a boelago, gona e sa le Moya wa Gagwe o go bitša, o go tliša fa. A go na le ba bantši ka mo ba ka ratago go tla ka nako ye? A go na le yo mongwe a ka ratago go tla? Gomme, mo ge re sa kgona go neela thapelo bakeng sa gago.

¹⁵² A go na le ba bangwe mo ba sego ba tlatšwa ka Moya wo Mokgethwa ba ba ka ratago go tla le go ema ka lehlakoreng le la ka godimo mo, nakwana feela. Ke a le leboga. Modimo a le šegofatše. A go ka ba yo mongwe yo a ka ratago go amogela Moya wo Mokgethwa gonabjale? Le a bona? Etla gomme o eme thwi fa.

¹⁵³ Gomme ge o se Mokriste gomme o nyaka go phološwa, etla, ema thwi fa. Go lokile. Lena ba le nyakago Moya wo Mokgethwa

emang godimo fa hleng le piano. Lena ba le nyakago Kriste bjalo ka Mophološi wa lena, emang thwi mo. Thwi godimo mo, se ke—emang thwi mo. Le a rereša, baena, thwi fa. Go lokile. A o be o le bakeng sa phološo bakeng sa soulo ya gago, ngwanešu? Go lokile, ema thwi fa, mohlomphegi, thwi fa. Yeo ke nnete. Bjale, bao ba nyakago phološo ya soulo ya bona, etlang le eme thwi mo pele ga ka. Bao ba nyakago kolobetšo ya Moya wo Mokgethwa, etlang le eme thwi godimo fa feela nakwana.

¹⁵⁴ Elelwang, ke bolela Leineng la Jesu Kriste, Yo a tiišeditšego Lentšu la Gagwe, O mo le wena. Yeo ke... Ke ba bakae ba dumelago gore Moya wo o lego magareng ga rena bošegong bjo ke Moya wola o bilego ka go Kriste Jesu, Yo a sepetšego ka Galelia, Yo a amogetšwego godimo, gomme Jesu Yenamong, mmele Jesu, Tabarenekele ya Modimo, e na le Modimo godimo ga Terone ya seatla sa Gagwe se setona? Ke ba bakae ba dumelago seo? Jesu, Monna o ka seatleng se setona. Eupša Moya wo Mokgethwa o fa ka go rena ka lehu la Gagwe o re hlwekiša, gore A ke a šome thato ya Gagwe ka Kereke ya Gagwe. A le dumela seo? Gona woo ke Moya wo Mokgethwa wa Gagwe o dira dilo tša go swana tšeo A tla di dirago ge A eme fa ka Motho. Mogau wa Gagwe o hlwekišitše Kereke ya Gagwe le go re tliša go ye. A le tla tla?

¹⁵⁵ Pina e tee feela. A o ka dira, kgaetšedi? Pina e tee, temana e tee ya pina: *Ke Nyakile Ke Kgodišwa*. A o ka re fa khiye go yeo? Gomme ke tla rata go botšiša gape, a le ka tla bjale ntle le go phegelelwa? Ge temana e tee e nnoši. Ge o le modiradibe, etla, ema fa pele ga ka. Ge o nyaka Moya wo Mokgethwa, etla, ema thwi fa. Ge re sa opela temana ye, a le ka tla bjale?

“Kenyakile ke kgodišwa,” bjale...

¹⁵⁶ Le bona se Moya wo Mokgethwa o se dirilego? O tlike thwi godimo le go dira se. Ke eng bontši A ka go se dira? Ke eng bontši A ka se kgodišago? Go kgodiša. A o ka se tle, mogwera modiradibe? A o ka se tle, wena yo a nyakilego Moya wo Mokgethwa botelele bjalo?

...Kriste go amogela;

A o ka se sepelele ntle bjale?

...bjale, soulo tsoko...

Modimo a go šegofatše, mothepana.

“Sepela, Moya...

A o ka Mo gana?

Le lengwe gape la maswanedi...

Letšatši la maswanedi? O ka kgona bjang go ba le maswanedi kudu?

...go Wena ke tla...

¹⁵⁷ Go ka reng ge o ka hwetša letšatši la gago la maswanedi gomme A se be gona? O mo bjale. Gobaneng ye e se nako ya

gago ya maswanedi? Bjale, ye ke iri ya phološo, ye ke nako go Mo amogela, ye ke nako ya go tlatšwa ka Moya wo Mokgethwa, ge Moya wo Mokgethwa o sa le mo o le gona, netefatšo ya go se ganetšege ya Lentšu la Gagwe gore O a phela. Gomme ka gobane O a phela, O nyaka le phele, le lena. Banna le basadi ba ba emego mo bjale, ba itshola, Jesu o rile, “Yo a tlogo go Nna, Nka se mo rakele ntle le ka mokgwa ofe.” Gomme O rile, “Ga go motho a ka tlogo go Nna, ntle le ge Tate wa Ka a mo goga pele.”

¹⁵⁸ Le bona se se diregilego bošegong bjo? Tate Modimo yo mogolo wa Legodimo o dirile, ka Bogona bja Gagwe bja go hlomphega o re šegofaditše, le go re tlotša, le go ipontšha Yenamong go phela magareng ga rena. Gomme O boletše le lena, bjalo ka batho ka batho le go le tliša ntle mo, gore le ke le phološwe le go dumela go Yena, gore A ke a le direle se go sego selo gape se ka kgonago go se dira: a ke a le phološe le go le tšeela Letagong, gomme le tla phela go kgabola mabaka ohle a Gosafelego ao a tlogo, le na le Bophelo bjo Bosafelego. Mošegofatšwa ke motho yoo yo a kwago Lentšu la Modimo gomme a Le šetša.

¹⁵⁹ Gomme go lena mo ba le Mo amogetšego bjalo ka Mophološi wa lena, gomme le nyaka go tlatšwa ka maatla a a Bogona bja Gagwe, gore A ke a bolele ka lena le go šoma go phološa ba bangwe, seo ke se Moya wo Mokgethwa o lego bakeng sa sona, ke go šoma ka lena bakeng sa phološo ya ba bangwe, go godiša Kereke, tshepišo e be e le go lena.

¹⁶⁰ Petro o rile ka Letšatši la Pentecost, “Sokologang, yo mongwe le yo mongwe wa lena gomme le kolobetšweng Leineng la Jesu Kriste bakeng sa go tlošwa ga dibe tša lena,” seo ke se le se dirilego, “gomme le tla amogela Mpho ya Moya wo Mokgethwa. Ka gore tshepišo ke ya lena, le go bana ba lena, le go bona ba ba lego kgole, le ba bantši ba Morena Modimo wa rena a tlogo go ba bitša.” Tshepišo ke ya rena, gomme bjale, tshepišo ke ya gago, e swanetše go ba.

¹⁶¹ Bjale, ke ya go kgopela banešu badiredi ge ba ka ikiša bonabeng thwi go dikologa batho ba ba go sokologa tlase fa, ge le ka rata, thwi go tšwa sefaleng, thwi tlase, ge ka moka ga lena le dula ka moagong, gomme e nong go dula dinakwana di se kae. Bjale, feela, goba, a le na le dikamora tša bona? Bokaonana. Dikamora tša ba, ka lehlakoreng le. Ke maswabi, ke lebetše seo. O ya . . . 

59-1120 Moprofeta Wa Go Swana Le Moshe
Santa Clara County Fairgrounds
San Jose, California U.S.A.

NORTH SOTHO

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org